



KEWASPADAAN TERHADAP AGENDA MUSUH ISLAM DALAM GERAKAN DAKWAH: PERBINCANGAN HADITH BERKAITAN DALAM KARYA SAYYID MUHAMMAD NUH

Muhammad Arif Yahya

Pusat Akidah dan Keamanan Global, Fakulti Pengajian Islam, Universiti Kebangsaan Malaysia

Abstract

Strategi di dalam menggerakkan dakwah melalui gerakan Islam memerlukan perancangan yang menyeluruh termasuk kewaspadaan terhadap agenda musuh Islam. Gerak kerja dakwah bukan hanya membangunkan potensi ahli melalui proses tarbiyah yang dijalankan, malahan perkara yang boleh merosakkan matlamat dan objektif dakwah termasuk agenda musuh-musuh Islam ini. Kajian ini bertujuan melihat huraian hadith yang dikemukakan oleh Sayyid Muhammad Nuh yang menyentuh isu kewaspadaan terhadap agenda musuh Islam ini. Karya-karya beliau yang dipilih iaitu Tawjihat Nabawiyyah 'ala al-Tariq, Afat ala al-Tariq dan karya Min Akhlaq al-Nasr fi Jiyl al-Sahabah. Hadith-hadith yang dikaji adalah berkaitan tuntutan berada di dalam jamaah serta janji kemenangan kepada umat Islam yang telah dikaitkan dengan isu kewaspadaan terhadap agenda musuh Islam dalam huraian hadith tersebut. Hasil kajian mendapati bahawa huraian hadith yang diketengahkan oleh Sayyid Muhammad Nuh berdasarkan pendekatan dakwah harakiyyah dalam gerakan Ikhwan Muslimin. Implikasi kajian ini bahawa gerakan dakwah perlu mengkaji dan waspada terhadap agenda musuh-musuh Islam dalam menggerakkan dakwah agar organisasi yang dibina mampu mengatur langkah dan strategi dalam mendepani agenda tersebut secara lebih berkesan.

Kata kunci: *Strategi dakwah, gerakan Islam, agenda Musuh Islam, hadith, Sayyid Muhammad Nuh*

Article Progress

Received: 27 November 2018

Revised: 15 Disember 2018

Accepted: 15 Disember 2018

*Corresponding Author:

Muhammad Arif Yahya
Pensyarah Kanan,
Pusat Akidah dan Keamanan
Global, Fakulti Pengajian Islam,
Universiti Kebangsaan
Malaysia
Email: arifyahya@ukm.edu.my

1. Pengenalan

Islam amat menekankan aspek perancangan dalam gerak kerja samaada melibatkan tugas secara individu atau berkumpulan. Gerakan dakwah yang digerakkan dalam sesebuah organisasi memerlukan perancangan bukan hanya dilihat dari aspek pembinaan ahli semata malah juga perkara yang boleh merosakkan pembinaannya seperti perancangan musuh daripada luar. Gerak kerja dakwah secara organisasi merupakan tuntutan sunnatullah yang memerlukan tenaga secara kolektif bersesuaian dengan ajaran dan Sunnah yang telah ditunjukkan oleh Rasulullah s.a.w.

2. Gerakan Islam dan Kewaspadaan Terhadap Agenda Musuh Islam

Musuh Islam sentiasa memiliki agenda dalam mengagalkan usaha dakwah dan dengan niat untuk meruntuhkan institusi Islam. Pertembungan antara hak dan kebatilan ini akan sentiasa berlaku dalam setiap masa dan tempat. Musuh-musuh agama bergerak dengan niat untuk memadamkan api kemaraan Islam dalam segenap perkara dan perancangan. Gerakan Islam perlu waspada dengan agenda musuh-musuh Islam dalam bergerak secara organisasi. Rasulullah s.a.w memiliki metode dalam membentuk semangat jihad dikalangan para sahabat dan salah satu darinya ialah waspada terhadap tipu daya musuh dengan maksud jihad yang



lebih luas bermula dasarnya ialah musuh syaitan (kalimah isti'azah) sehingga menentang musuh di medan jihad (Sayyid Muhammad Nuh : 1993). Salah satu wabak negatif yang telah dihadapi oleh para pendakwah ketika ini ialah kurangnya perancangan sedangkan musuh-musuh Islam sentiasa merancang untuk tujuan menghancurkan kewujudan umat Islam itu sendiri (Ali Jarisyah : 1979). Perkara ini dikategorikan sebagai barah kesakitan pemikiran dikalangan para pendakwah (Jasim Muhammad Muhallal al-Yasin : 2007). Oleh yang demikian, gerakan dakwah perlu bersikap waspada dan tahu gerak kerja musuh-musuh Islam agar perancangan yang telah dibuat dalam gerakan dakwah dapat berjalan dengan lancar dan tidak diganggu atau disekat dengan perancangan musuh-musuh Islam tersebut.

3. Sayyid Muhammad Nuh dan Ketokohnya Dalam Bidang Hadith dan Dakwah

Sayyid Muhammad Nuh dilahirkan di `Uzbah al-Siba`i, daerah Kafr al-Shaykh, Mesir pada 23 Jumada al-Ula 1365, bersamaan 24 April tahun 1946M (al-Husayn 2010). Dibesarkan di kampung dalam keluarga yang cukup sederhana dan miskin. Beliau berjaya menamatkan hafalan al-Quran sewaktu usianya 8 tahun. Setelah itu, beliau menyambung pengajian di Ma`ahad al-Azhari al-Ibtida`i di Kafr al-Shaykh. Kemudian memasuki peringkat menengah di Ma`ahad al-Mahallah al-Azhari al-Thanawi. Ketika di alam persekolahan menengah lagi, Sayyid Nuh banyak mengikuti program tasawuf dari beberapa orang gurunya, antaranya `Abd al-Salam Abu al-Fadl, yang merupakan guru beliau dalam mengesani jiwa dan kerohaniannya. Teman rapat dan rakan seperjuangan Sayyid Nuh ketika berguru dengan `Abd al-Salam Abu al-Fadl ialah Yahya Ismail yang kemudiannya berperanan dalam memperkenalkan kepada Sayyid Nuh, dakwah haraki Ikhwan Muslimin (Ubadah Sayyid Nuh 2012). Di dalam bidang akademik, minat Sayyid Nuh begitu mendalam dalam bidang pengajian hadith dan mendorongnya untuk melanjutkan pelajaran sehingga ke peringkat Ph.D dalam bidang ini. Beliau menamatkan ijazah pertama di Universiti al-Azhar pada tahun 1971M (al-Husayn 2010). Kemudian melanjutkan pelajaran ke peringkat Sarjana dan berjaya menamatkan pengajiannya pada tahun 1973 dengan disertasi kajian bertajuk

Perkahwinan Rasulullah (s.a.w.) dengan Zaynab binti Jahsy; Menolak Tohmahan Sekitar Perkahwinan itu berdasarkan Manhaj Golongan Muhaddisin. Kemudian beliau melanjutkan pelajaran ke peringkat Ph.D dan berjaya menamatkan pengajiannya pada tahun 1976 dengan tajuk tesis kajian : "Al-Hafiz Abu al-Hajjaj Yusuf al-Mizzi dan Kesungguhannya dalam Penulisan Tahdhib al-Kamal". Tesis ini telah meraih tempat cemerlang (mumtaz). Sayyid Muhammad Nuh telah menunjukkan ketokohnya dalam menyerlahkan sumbangan al-Hafiz al-Mizzi melalui penghasilan tesis Ph.D ini. Hasil penemuan kajian bagi tesis ini juga telah memberikan suatu gambaran yang jelas kepada penuntut ilmu hadith pada ketika itu, khususnya di Universiti al-Azhar sendiri dalam memahami dengan lebih baik kandungan kitab Tahdhib al-Kamal (Yahya Ismail 2012).

Penglibatan beliau dalam gerakan dakwah Ikhwan Muslimin pada mulanya ketika beliau mula berjinak mengikuti penulisan `Umar al-Tilmisani di dalam Majallah al-Da`wah al-Ikhwaniyyah. `Umar Tilmisani adalah merupakan Mursyidul Am ketiga Ikhwan Muslimin setelah kematian Mursyidul Am yang kedua, iaitu Hasan al-Hudaybi pada tahun 1973. Di samping membaca dari tulisan-tulisan haraki Majallah al-Da`wah al-Ikhwaniyyah ini, beliau juga mengikuti program-program yang dikendalikan oleh Shaykh Muhammad al-`Adawi di perkampungan Mahallah Abu `Ali, Mahallah al-Kubra, Mesir (Ikhwan wiki 2013). Sayyid Nuh mengikuti program ini bersama-sama dengan teman rapatnya Yahya Isma'il yang ketika itu banyak menyalurkan fikrah-fikrah Ikhwan ke dalam kehidupan Sayyid Nuh (Yahya Ismail



2012). Sejak mengikuti program tersebut dan terkesan dengan sentuhan Shaykh Muhammad al-`Adawi, beliau mula melibatkan diri secara aktif dalam gerakan dakwah Ikhwan Muslimin (Wasfi Asyur 2013). Sayyid Muhammad Nuh keluar dari Mesir tahun 1981 pada asalnya memenuhi jemputan sebagai Pensyarah Pelawat di Universiti Qatar. Pada ketika itu juga, keadaan di Mesir tidak stabil dan ramai dari anggota Ikhwan Muslimin telah ditangkap dan dipenjarakan. Sayyid Muhammad Nuh juga merupakan salah seorang anggota Ikhwan yang disenaraikan dalam perintah penangkapan tersebut. Kalaulah tidak kerana panggilan sebagai pensyarah jemputan ke Universiti Qatar tersebut, Sayyid Muhammad Nuh kemungkinan akan ditangkap dan dipenjaran bersama anggota Ikhwan yang lain. Beliau telah berkhidmat di Universiti Qatar selama setahun (1981-1982). Kemudian beliau merantau di beberapa Universiti di Emiriah dan Dubai bermula tahun 1982 dan berakhir di Universiti Kuwait setelah menetap di sana bermula tahun 1993 sehingga beliau meninggal dunia tahun 2007 (Yahya Ismail 2012; al-Husayn 2010).

Sayyid Muhammad Nuh telah menghasilkan penulisan dalam beberapa bidang terutamanya bidang hadith. Antara karya-karya beliau dalam bidang hadith dan dakwah iaitu ; *Tawjīhāt Nabawiyyah ‘alā al-Ṭarīq* (Juzuk 1, 2 dan 3), *Min Akhlāq al-Naṣr fī Jayl al-Ṣaḥābah*, *Manhaj al-Rasūl fī Ghars Rūḥ al-Jihād fī Nufūs Aṣḥābih*, *Āfāt ‘alā al-Ṭarīq* (5 Juzuk), *Al-Ḥāfiẓ Abū al-Hajjāj al-Mizzī wa Juhūduh fī Kitāb Tahdhīb al-Kamāl*, *Al-Ṣaḥābah wa Juhūduhum fī Khidmah al-Ḥadīth al-Nabawī*, *Al-Tābi‘ūn wa Juhūduhum fī Khidmah al-Ḥadīth al-Nabawī*, *Shifā’ al-Ṣudūr fī Tārīkh al-Sunnah wa Manāhij al-Muḥaddithin*, *‘Ilm al-Ṭabaqāt: Haqīqatuh wa Qimātuh al-‘Ilmiyyah wa al-Haḍariyyah*, *Manāhij al-Muḥaddithīn fī Riwayah al-Ḥadīth bi al-Ma‘na*, *Muqaddimāt fī Takhrīj al-Ḥadīth*, *Al-Mabṣūṭ fī ‘Ilm Ruwwah al-Ḥadīth*, *Al-Marwiyyat fī al-Tafsīr wa al-Maghāzī*, *Barnāmij Dirāsah al-Asānīd wa Ṭuruq Takhrījūhā*, *Al-Manhal al-Rāwī fī ‘Ulūm al-Ḥadīth li Ibn Jama‘ah* (Taḥqīq).

Berdasarkan sebahagian karya-karya Sayyid Muhammad Nuh yang telah dikemukakan menunjukkan bahawa beliau memiliki kepakaran dalam bidang hadith secara khusus. Selain itu, penglibatan beliau dalam gerakan dakwah Ikhwan Muslimin banyak mempengaruhi cara penulisan disamping kecenderungan penghasilan karya dakwah dengan pendekatan haraki dan gerakan Islam (Muhammad Arif Yahya : 2015).

4. Kewaspadaan Terhadap Agenda Musuh Islam Dalam Huraian Hadith Sayyid Muhammad Nuh

Sayyid Muhammad Nuh banyak membincangkan isu-isu gerakan dakwah dalam karya-karya hadith yang telah dihasilkan antaranya ialah berkaitan kewaspadaan terhadap agenda musuh-musuh Islam oleh gerakan dakwah. Organisasi dakwah yang dibentuk memerlukan sikap waspada terhadap agenda musuh Islam agar gerak kerja dakwah tidak terbantut dengan perancangan jahat musuh-musuh Islam. Munir al-Ghadban menganalisis pendekatan gerak kerja dakwah berasaskan al-Sirah al-Nabawiyyah dan strategi dalam menghadapi perancangan jahat musuh-musuh turut disentuh dalam kajian ini (Munir al-Ghadban : 1998). Sayyid Muhammad Nuh turut mengemukakan perbincangan berkaitan isu sikap waspada terhadap agenda musuh Islam ini ketika mengemukakan huraian terhadap hadith. Hadith-hadith ini walaupun tidak menjurus secara langsung berkaitan topik langkah strategi musuh-musuh Islam, namun Sayyid Muhammad Nuh turut mengaitkan dengan topik tersebut dalam melihat pendekatan dakwah secara lebih meluas. Di dalam perbincangan ini dikemukakan tiga contoh hadith yng dihuraikan oleh Sayyid Muhammad Nuh iaitu hadith berkaitan larangan berpisah daripada jamaah, hadith kedua juga berkaitan larangan berpecah dan tuntutan berada di dalam jamaah tetapi dihuraikan oleh Sayyid Muhammad Nuh di dalam



karyanya yang lain. Manakala hadith yang ketiga adalah berkaitan janji kemenangan umat islam diatas muka bumi ini.

Hadith berkaitan larangan berpisah daripada jamaah dipetik daripada karya Tawjihat Nabawiyyah ‘ala al-Tariq sepertimana berikut :

عن أبي ذر رضي الله عنه أن رسول الله صلى الله عليه وسلم "مَنْ فَارَقَ الْجَمَاعَةَ شِرْبًا فَقَدْ خَلَعَ رِبْقَةَ الْإِسْلَامِ مِنْ عُنُقِهِ"

Terjemahan Hadith : Daripada Abu Dhar r.a katanya bahawa Rasulullah SAW bersabda “Sesiapa yang memisahkan diri dari jamaah walaupun sejengkal maka bererti dia telah melepaskan ikatan Islam dari tengkuknya”. Takhrij Hadith : Hadith ini diriwayatkan oleh Abu Da’ud di dalam Sunannya, Kitab al-Sunnah, Bab fi Qatl al-Khawarij, no hadith 4758. Hadith ini dihukum dengan status sahih oleh al-Albani. (Sulayman bin al-Asy’ath Abu Da’ud al-Sijistani : t.t, 4:241, Sahih Sunan Abi Da’ud. Nasir al-Din al-Albani, Sahih Sunan Abi Da’ud, 3:167).

Hadith yang kedua berkaitan tuntutan untuk berada di dalam jamaah dan menjauhi perpecahan dipetik daripada karya Afat ala al-Tariq sepertimana berikut :

عَنِ ابْنِ عُمَرَ قَالَ : خَطَبَنَا عُمَرُ بِالْحَابِيَةِ فَقَالَ : يَا أَيُّهَا النَّاسُ, إِنِّي قُتِمْتُ فِيكُمْ كَمَقَامِ رَسُولِ اللَّهِ صَلَّى اللَّهُ عَلَيْهِ وَسَلَّمَ فِينَا فَقَالَ : "أَوْصِيكُمْ بِأَصْحَابِي, ثُمَّ الَّذِينَ يَلُوتُهُمْ, ثُمَّ الَّذِينَ يَلُوتُهُمْ, ثُمَّ يَمَشُوا الْكُذِبَ حَتَّى يَخْلِفَ الرَّجُلُ وَلَا يُسْتَحْلَفُ, وَيَشْهَدَ الشَّاهِدُ وَلَا يَسْتَشْهَدُ, أَلَا لَا يَخْلُونَ رَجُلًا بِأَمْرَةٍ إِلَّا كَانَ تَالِثُهُمَا الشَّيْطَانُ, عَلَيْكُمْ بِالْجَمَاعَةِ وَإِيَّاكُمْ وَالْفُرْقَةَ, فَإِنَّ الشَّيْطَانَ مَعَ الْوَاحِدِ, وَهُوَ مِنَ الْإِنْسَانِ أَبْعَدُ, مَنْ أَرَادَ مُجْبُوْحَةَ الْجَنَّةِ فَلْيَلْزِمِ الْجَمَاعَةَ, مَنْ سَرَّتْهُ حَسَنَتُهُ وَسَاءَتْهُ سَيِّئَتُهُ سَيِّئَتُهُ فَذَلِكُمْ الْمُؤْمِنُ."

Terjemahan Hadith : Daripada Ibn Umar r.a katanya : Umar telah menyampaikan khutbah kepada kami di al-Jabiyah dengan berkata : Wahai sekalian manusia, sesungguhnya saya berdiri disini sepertimana kedudukan Rasulullah SAW bersama kita lantas bersabda “Saya berwasiat kepada kalian dalam urusan sahabatku, kemudian orang-orang setelah mereka (Tabi‘in) dan orang-orang setelah mereka (Tabi‘ Tabi‘in). Kemudian tersebarnya kedustaan sehingga seseorang akan bersumpah tanpa diminta dan memberikan persaksian tanpa diminta. Tidak akan bersendirian diantara seorang lelaki dan perempuan kecuali yang ketiganya adalah syaitan. Hendaklah kalian berpegang kepada jamaah dan jangan sesekali berpecah belah, kerana syaitan akan bersama mereka yang bersendirian dan syaitan akan lebih jauh jika berdua. Sesiapa yang inginkan bahagian di tengah syurga maka berpeganglah kepada jamaah. Sesiapa yang merasai keseronokan ketika melakukan kebaikan dan merasai kegelisahan (susah hati) ketika melakukan kejahatan maka itulah seorang mukmin”.Takhrij Hadith : Hadith ini diriwayatkan oleh al-Tirmidhi di dalam Sunannya, Kitab Abwab al-Fitan, Bab Maja’a fi Luzum al-Jama’ah, no hadith 2165. Al-Albani menilai hadith ini dengan hadith : Sahih.



Hadith yang ketiga adalah berkaitan kemenangan umat Islam hasil usaha dakwah yang dikerjakan dipetik daripada karya Min Akhlaq al-Nasr fi Jiyl al-Sahabah sepertimana berikut:

عَنْ خَبَّابِ بْنِ الْأَرْتِّ، قَالَ : شَكَوْنَا إِلَى رَسُولِ اللَّهِ صَلَّى اللَّهُ عَلَيْهِ وَسَلَّمَ، وَهُوَ مُتَوَسِّدٌ بُرْدَةً لَهُ فِي ظِلِّ الْكَعْبَةِ، قُلْنَا لَهُ : ”أَلَا تَسْتَنْصِرُ لَنَا؟ أَلَا تَدْعُوا اللَّهَ لَنَا؟ قَالَ : كَانَ الرَّجُلُ فِيمَنْ قَبْلَكُمْ يُخْفِرُ لَهُ فِي الْأَرْضِ، فَيَجْعَلُ فِيهِ فَيْجَاءً بِالْمِيشَارِ، فَيُوضَعُ عَلَى رَأْسِهِ، فَيُشَقُّ بِإِثْنَتَيْنِ، وَمَا يَصُدُّهُ ذَلِكَ عَنْ دِينِهِ، وَمُتَشَطُّ بِأَمْشَاطِ الْحَدِيدِ مَا دُونَ لَحْمِهِ مِنْ عَظْمٍ أَوْ عَصَبٍ وَمَا يَصُدُّهُ ذَلِكَ عَنْ دِينِهِ وَاللَّهُ لَيَمَنَّ هَذَا الْأَمْرَ حَتَّى يَسِيرَ الرَّكَّابُ مِنْ صَنْعَاءَ إِلَى حَضْرَ مَوْتٍ لَا يَخَافُ إِلَّا اللَّهَ أَوْ الذُّبَّ عَلَى غَنَمِهِ وَلَكِنَّكُمْ تَسْتَعْجِلُونَ“

Terjemahan Hadith : Daripada Khabbab bin al-Arat r.a katanya: Kami telah mengadu pada Rasulullah SAW sedang Rasulullah sedang berbaring di bawah naungan Kaabah berbantakan serban, maka kami bertanya “Apakah tuan tidak berdoa memohon kemenangan bagi pihak kita? Adakah tuan tidak berdoa bagi pihak kita?. Maka berkata Rasulullah SAW: “Sesungguhnya seorang lelaki dari golongan sebelum kamu ditangkap lantas digali lubang dan ditanam di dalamnya, kemudian dibawa datang gergaji lalu digergaji kepalanya sehingga terbelah dua dan disikat badannya dengan sikat besi sehingga meluruhkan daging dan tulangnya, namun demikian tidak memalingkan ia dari agamanya. Demi Allah, nescaya Allah menyempurnakan urusan ini (agama Islam), sehinggalah musafir dari San‘a ke Hadra Maut tidak lagi merasa takut melainkan hanya kepada Allah atau serigala yang memakan kambingnya, akan tetapi kamu ini adalah golongan yang gopoh”. Takhrij hadith : Hadith ini diriwayatkan oleh Imam Bukhari, kitab al-Manaqib, no hadith 3612.

Sayyid Muḥammad Nūḥ di dalam beberapa karyanya banyak menekankan tentang perihal musuh-musuh Islam dan agenda mereka dalam menghadapi umat Islam. Beliau mengingatkan anggota gerakan dakwah supaya mengambil sikap berhati-hati dan peka terhadap perkembangan musuh-musuh Islam yang sentiasa mencari peluang dan ruang untuk melakukan tindakan dan serangan ke atas umat Islam. Malah antara perkara yang malang dan situasi yang menyedihkan sekiranya kesatuan berlaku dikalangan anggota-anggota musuh Islam dan perpecahan serta perbalahan pula berlaku dikalangan umat Islam.

Di dalam kitab Tawjihat Nabawiyyah ‘ala al-Tariq, contoh huraian hadith yang dikemukakan oleh Sayyid Muḥammad Nūḥ dalam isu mengenai agenda musuh-musuh Islam ini iaitu saranan supaya seorang muslim sentiasa berada di dalam jamaah dan ancaman terhadap mereka yang menjauhi diri dari jamaah. Ketika menyentuh mengenai peranan jamaah dalam kehidupan seorang muslim, Sayyid Muḥammad Nūḥ turut menyebutkan mengenai agenda musuh-musuh Islam ini (Sayyid Muhammad Nuh : 1998). Beliau menyebutkan bahawa peranan sesebuah jamaah dalam kehidupan seorang muslim ialah meniupkan semangat dan harapan dalam bergerak ke arah penyebaran Islam serta menghadapi segala cabaran dan perancangan musuh dengan penuh kekuatan. (Sayyid Muhammad Nuh : 1998). Ini kerana mereka yang bergerak secara bersendirian, apabila melihat kekuatan musuh dengan segala kecanggihan teknologi dan perancangan jahat mereka, kemungkinan sifat putus asa (futura) akan timbul dalam diri seorang pendakwah. Tetapi bagi pendakwah yang bergerak dalam jamaah dan bekerja dalam menyebarkan dakwah Islamiyyah secara kolektif, sifat-sifat



negatif seperti putus asa dan lemah semangat dalam menghadapi cabaran musuh akan dapat ditangani dengan baik. (Sayyid Muhammad Nuh : 1998). Ini adalah antara huraian yang dikemukakan oleh Sayyid Muhammad Nūḥ ketika membahaskan perbincangan mengenai hadith dari kitab Tawjihāt Nabawiyah berkenaan saranan supaya sentiasa melazimi jamaah dalam kehidupan seorang pendakwah. Jelas di dalam huraian tersebut bahawa Sayyid Muhammad Nūḥ turut mengingatkan tentang perihal musuh-musuh Islam yang bekerja siang dan malam dalam menghadapi kebenaran Islam dan umatnya.

Perkara yang sama ditekankan oleh Sayyid Muhammad Nūḥ di dalam kitabnya, *Min Akhlaq al-Nasr fi Jiyl al-Sahabah*. Ketika membahaskan salah satu akhlak kemenangan para sahabat, iaitu “Sentiasa Berada dalam Kesatuan dan Jamaah”, beliau menyebutkan beberapa hadith dalam huraian mengenai tajuk tersebut antaranya hadith yang diriwayatkan oleh Ibn Umar seperti mana di dalam jadual di atas. Sayyid Muhammad Nūḥ menyebutkan beberapa panduan dan langkah ke arah merealisasikan kesatuan dan pembentukan jamaah pada masa kini bagi meraih kemenangan seperti mana yang telah diraih oleh para sahabat r.a. Antara yang disebutkan oleh Sayyid Muhammad Nūḥ berkaitan panduan tersebut iaitu beliau mengajak supaya meneliti tentang hakikat musuh-musuh Islam kini yang sentiasa bersatu dan berusaha untuk saling mengadakan perbincangan dan perjumpaan di samping melakukan kesepakatan dalam beberapa bidang seperti ketenteraan, perniagaan dan politik. (Sayyid Muhammad Nuh : 1994). Sayyid Muhammad Nūḥ menyebutkan bahawa walaupun musuh-musuh Islam ini berada di pihak kebatilan, malah perselisihan di antara mereka juga menyentuh dari sudut kepercayaan dan perbezaan akidah, tetapi mereka tetap melakukan kesepakatan dan mampu untuk melakukan rundingan sesama mereka. (Sayyid Muhammad Nuh : 1994). Realiti ini menurut Sayyid Muhammad Nūḥ, jika diteliti dan direnungi oleh umat Islam yang memiliki akal yang waras dan jiwa yang hidup mampu membawa kesedaran ke arah kesepakatan dan kesatuan di antara umat Islam. (Sayyid Muhammad Nuh : 1994).

Di dalam kitab *Afat ‘ala al-Tariq*, ketika membahaskan tentang tajuk *al-Isti‘jal*, Sayyid Muhammad Nūḥ turut menyentuh mengenai situasi musuh-musuh Islam, serta agenda dan pendekatan mereka yang tidak dikaji oleh umat Islam sehingga membawa kepada berlakunya sikap *al-Isti‘jal*. (Sayyid Muhammad Nuh : 1999). Hadith yang dikemukakan oleh Sayyid Muhammad Nūḥ dalam membahaskan berkaitan penyakit *al-Isti‘jal* ini iaitu hadith yang diriwayatkan oleh *Khabbab bin al-Arat* r.a. seperti mana di dalam jadual di atas. Beliau menyebutkan, kedudukan musuh-musuh Islam ketika ini berada di tahap penguasaan yang lebih tinggi dari umat Islam. Mereka menguasai pemerintahan dan kebanyakan negara-negara Islam di bawah penguasaan mereka. Gerak kerja yang dilakukan oleh musuh-musuh Islam juga lebih mendepani gerak kerja Islam sehingga mereka mampu memadamkan suara-suara kebenaran di kebanyakan tempat dan negara. (Sayyid Muhammad Nuh : 1999).

Sayyid Muhammad Nūḥ seterusnya mengemukakan contoh realiti yang membuktikan wujudnya agenda jahat musuh-musuh Islam terhadap umat Islam. Antara contoh realiti tersebut iaitu Gerakan Zionis Israel yang dahulunya hanyalah suatu pemikiran dan ideologi, namun pada hari ini ideologi tersebut sudah menjadi realiti yang telah menguasai tanah umat Islam Palestin. Selain itu, gerakan ini mempunyai strategi yang lebih luas untuk menguasai negara-negara arab yang lain agar mimpi dan ideologi Zionis mereka menjadi realiti iaitu “Negara Israel bermula dari Sungai Nil hingga ke Sungai Furat”. (Sayyid Muhammad Nuh : 1999).



Penutup

Berdasarkan perbincangan yang telah dikemukakan ini dapat disimpulkan bahawa antara perbincangan yang diketengahkan oleh Sayyid Muḥammad Nūḥ dalam huraian hadith-hadith di dalam karya-karyanya adalah mengenai agenda musuh-musuh Islam yang perlu diambil perhatian dan peka terhadap pendekatan mereka dalam usaha memusuhi Islam dan umatnya. Hadith-hadith yang dihuraikan oleh Sayyid Muhammad Nuh seperti ini Gerakan-gerakan dakwah perlu mengkaji agenda-agenda jahat musuh-musuh Islam ini sebagai langkah berhati-hati di samping mampu mengatur langkah strategi yang lebih berkesan dalam menghadapi tekanan dan perancangan jahat musuh-musuh Islam tersebut.

RUJUKAN

1. Jarisyah, A., (1979), *Du'ah La Bughah*, Dar al-Buhuth al-Ilmiyyah : Kuwait, hlm. 118-119.
2. Jasim, M. M. Y (2007), *al-Dawlah al-Islamiyyah Bayna al-Wajib wa al-Mumkin, Syuruq li al-Nasr wa al-Tawzi'* : al-Mansurah, hlm. 246.
3. Sayyid M. N. (1991), *Manhaj Ahl al-Sunnah wa al-Jama'ah fi Qadiyyah al-Taghyir bi Janibayh al-Tarbawi wa al-Da'awi*, cet ke 2, al-Mansurah ; Dar al-Wafa'.
4. Sayyid M. N. (1999), *Afat ala al-Tariq*, jilid 1, cetakan ke 13, Mansurah : Dar al-Wafa, hlm. 57- 58.
5. Sayyid M. N. (1998), *Tawjihat Nabawiyyah 'ala al-Tariq*, juzuk 1 & 2, Mansurah: Dar al-Yaqin, hlm. 129-130.
6. Sayyid M. N. (1994), *Min Akhlaq al-Nasr fi Jiyl al-Sahabah*, Beirut : Dar Ibn Hazm, hlm. 65-66.
7. Sayyid M. N. (1993), *Manhaj al-Rasul fi Ghars Ruh al-Jihad fi Nufus Ashabih*, Dar al-Wafa' : al-Mansurah, cet. ke 3, hlm. 81.
8. Muhammad Arif Yahya (2014), *Beberapa Isu Haraki di dalam Karya-karya Hadith Sayyid Muhammad Nuh*, *International Journal of Islamic Thought (IJIT)*, vol 5 (Jun) 2014.
9. Muhammad Arif Yahya (2015), *al-Manhaj al-Haraki Dalam Penulisan Sayyid Muhammad Nuh Menurut Perspektif Hadith : Aplikasi Dalam Isu-Isu Semasa Gerakan Dakwah Di Malaysia*, Tesis PhD, Jabatan al-Quran dan al-Hadith, Akademi Pengajian Islam, Universiti Malaya.
10. Muhammad Arif Yahya (2016), *Elemen al-Haraki Dalam Huraian Hadith : Kajian Terhadap Pendekatan Sayyid Muhammad Nuh Dalam Penulisannya*, prosiding International Muzakarah & Mu'tamar on Hadith 2016 (Imam 2016), Institut Kajian Hadith (INHAD), Kolej Universiti Islam Selangor (KUIS), conference.kuis.edu.my/imam2016/eproceeding/1004-imam-2016.pdf.
11. Munir G. (1998), *al-Manhaj al-Haraki li al-Sirah al-Nabawiyyah*, cet. ke 10, al-Mansurah: Dar al-Wafa', 1998, 25-28.
12. Munir G. (2009), *Manhaj Haraki :Strategi Pergerakan dan Perjuangan Politik dalam Sirah Nabi SAW*, Rabbani Press.
13. Yahya, M. A. (2016). *Sumbangan Ahl Al-Hadith Dan Peranannya Dalam Membangun Ketamadunan Islam*. *Journal Of Hadith Studies*, 1(1).